

临江仙

几处蹉跎秋已半，门前又过飞花。浮生一霎好年华。忽而寥落，未许更矜夸。
昨夜萧疏入梦里，不知皎月初斜。一时淡淡照归家。一时醒转，依旧在天涯。

浪淘沙 咏白梅花

素影小帘栊，诗境难工。玲珑更在月明中。珍重东君长有信，开与春风。
好景慢成终！一世飘蓬。明朝未必景犹同。但得明朝花亦好，不管匆匆。

相见欢 咏白梅花

月斜陌上轻尘，照愁身。清冷人间谁见一枝新。
沉梦断，风吹散，不堪循。好意芳年怜取过今春。

长相思

轻拢弦，慢拢弦，指底情怀暗暗传，淡妆明月前。
深抹弦，浅抹弦，莫对韶光忆旧年，当时误小怜。
高捻弦，低捻弦，苦调忽翻金石坚，有人泪正悬。
沉拨弦，急拨弦，弹罢高堂各尽欢，低眉辞盛筵。

人月圆 二首

冰壶乍泻秋之半，皎皎正相宜。风流自在，非因柳唱，不以苏词。
年年此约，山长水远，来照佳期。泠泠素影，人间一夜，多少相思。

盈亏不为人尘改，怜取向来痴。无心造化，多情空寄，终古何知？
四方尽望，或驰聚兴，或遣离悲。一轮只向，梧桐叶里，碧影稍移。

浣溪沙

浅淡罗衣闲草花，轻妆烂漫笑犹遮。当时明月照人家。
彼黍离离生故野，于飞燕燕到天涯。梦回清泪湿窗纱。

浪淘沙

云水已迢迢，寒袖难招。风烟半落半飘摇。自是离情挥已重，卮酒仍浇。
鸾镜怎魂销，辜负花朝。家山一度把人抛。一枕清愁还入梦，不尽潇潇。

临江仙

琐务闲行皆有味，稍稍尝了相宜。夜阑又到案牒西。归来风雨密，灯下晾罗衣。
造化如知应惜取，平生独我情痴。一重昏晓一重思。世情听且去，欢意本难齐。

菩萨蛮

情怀积久尤难写，一年又见秋深也。愁病悄相仍，而今人不胜。
夕山斜照冷，立尽黄昏影。往事梦还休，不知何处收。

浣溪沙

一霎清欢半已非，当初万里却君归。泪痕犹是别时衣。
秋到尽时愁未尽，月曾依处影还依。今宵寒梦正依稀。

归自谣

明月缺。问取平生终不说，清光宛转无情别。
相思深处犹自结。相思结，栏杆十二花如雪。

减字木兰花

梦回不语，夜又未销风又续。月上窗邻，一枕清光怜彻人。
芳年怀抱，谁见其间人正好？不若斜辉，犹得为君照晚归。

忆秦娥

香红泣，行人渐觉衣衫湿。衣衫湿，一轮烟雨，人间惊蛰。
黄昏拾取最高级，平林新野春光急。春光急，乱鸦暮里，有人斜立。

虞美人

清明过了无痕迹，烟月天心碧。旧园三见柳绵飞，着意和人清泪到罗衣。
几回梦见浮槎去，觉也愁无据。平波尽处夕阳低，故国春山犹在夕阳西。

踏莎行

春减一分，思生千尺，营营徒令浮生迫。萧疏独见晚归人，门庭积信低眉摘。
风上纱帘，烟心石陌，夜阑一段相思白。清欢惜取语君时，音书慢被重山隔。

虞美人

归来海上低相语，往事都如许。且行且住黛眉垂，惟见波心清冷月相随。
人怜好聚人还散，别梦如天远。觉时销得泪如斯，除却一钩新月没人知。

念奴娇

好东佳客，相携处，萍野悠悠鸣鹿。大水滂沱，耽集市，收拾杂粮五谷。
及至归家，都如出浴，便去理厨屋。“良辰何飧？”小强旋至曰“肉”。
犹记山顶同游，渺峰人极目，无边家国。海角逡巡，云水间，明月泠泠盈掬。
别日难凭，应怜人去后，落花空逐。行时天远，向来沧海摇绿。

木兰花

自从醉里辞京洛，北地花深人似削。孤鸿带远一天秋，明月听轻千载约。
楼高几日风萧索，夜色还来凝桂魄。今宵检点旧心情，随意浮云升且落。

清平乐 咏兰

香洲谁捡？幽意知深浅？绿水浇君君自染，叶叶蛾眉约敛。
故园曾满春时，而今也解一枝。不觉洗成清淡，风流自在心知。

踏莎行 咏冬雨

南陌仍铺，东篱未扫，清声数点迟来报。今宵何事助离愁？离愁早被西风恼。
晓梦惊残，昏桐滴老，流年鬓发宜相照。潇潇不语上春衫，轻寒却向人怀抱。

踏莎行

苔迹些些，蛩鸣缕缕。一春且慢流连去。觉来南陌绿阴浮，泥端犹滞长杨絮。
云际微溶，风行约住。明朝看取晴和雨。近来多著去年衣，情怀可似旧时许？

采桑子

帘稍数点潇潇雨，却恨今春。却送今春，远去东风剩此身。
旧园篱落别时月，又照离人。又劝离人，休立中庭梧影深。

浣溪沙

无梦清宵休自催，未妨残月作蛾眉。杏花天影任笛吹。
来者可追当送目，往兮不谏复何悲？浪深应怕弄潮儿。

行香子

时务匆筹，世事悬钩，偏愁浓爱上高楼。倏忽已是，花落成丘。看风吹来，风吹去，无人收。
何怜朝菌，争笑蜉蝣，只江心月影长流。云间鹄雁，帘外春秋。任到时回，到时走，倩谁留？

蝶恋花

为赠别离吹徵羽。最怕长亭，犹得长亭聚。近酒黄昏逢暮鼓，迢迢来助风吹雨。
一寸情怀成万缕。春日天涯，旧地伐棠杜。古道参差由认取，轻尘只作回风舞。

蝶恋花

雨乱风畸春未值。何事东君，恼乱司春职？尽日阑干长拂拭，飞红只顾无消息。
楼上离人空目极。久别长安，未竟长安忆。异国青山犹未识，一声归鸟忽穿臆。

十六字令 饮酒

红。悄上双腮洗更浓。清宵永，不教梦重逢。

清平乐

斜风脉脉，永日秋千索。残叶晓来遮曲陌，未尽相思颜色。
而今何事销魂？乱风裁剪黄昏。清夜不听笛弄，月痕仍到深深。

清平乐

雨宵风昼，销得人清瘦。曾教双眸凝豆蔻，都在春衫两袖。
当时明月人家，如今明月天涯。又是悄悄时候，帘栊一片飞花。

清平乐

鸣蛩细细，今昔玲珑地。尚有木樨开历历，明日幽香难觅。
高台一任风徊，凭栏罗裳吹开。明月迢迢万里，相思何处飞来？

蝶恋花

寂柳疏疏频把盏，寥落离歌，浑付长亭晚。曲陌无人香迹浅，孤舟残照依波转。
寒露侵帘帘不卷，迷乱飞红，石径苔痕满，暮鼓初敲无计掩，声声只送斜阳远。

鹧鸪天 病中

画角初回疏影横，谁收斜月到帘栊？梦魂尝似秋千索，异地悠悠永夜风。
思故旧，忆亲容，西风度雁去无踪。相怜只是天边月，且放清光照病容。

菩萨蛮 咏箏

丝桐何染潇湘水？弦弦尽作相思泪。竹碎寒烟初，落晖向晚疏。
思君盈耳目，十指频频误。幽恨倩谁收？残音飞不休。

扬州慢

月魄佳时，香山盛日，清秋自古良辰。却浮阴重雾，锁犀木香沉。
待晚来金樽对影，红炉火瘦，绿蚁酒醇。只年年孤雁重阳，独自销魂。
彩笺佳酿，到而今无不伤神。纵尺素书成，梅花折尽，寄与谁人？
莫若掩门归入，留阶畔浅淡苔痕。任无心风雨，断送无数黄昏。

鹧鸪天

未感秋来霜叶红，蒙尘镜里韶华生。浮生常落樽前泪，此暮飘萧疏雨声。
迎暮鼓，送晨钟，物华频易总堪惊。邻家稚子初学字，遥指西风数雁行。

鹧鸪天

无尽沉红幽迹茫，晓枫染醉素衣凉。青溪白石独行处，笛韵深飞梦里长。
人寂寂，影苍苍，寒溪流水逝清商。惟将旧日相思泪，弹与云天作飞霜。

如梦令

昨夕清秋薄暮，宛转一江风露。失路问渔舟，遥指暮云深树。
何处？何处？惟见烟峰无数。

渔家傲 岳飞

横下貔貅江海怒，英雄惊起汤阴路。万里戎机飞骑度，人还顾，匈奴不破家何处？
折戟红沙堪落暮，狼烟刁斗催寒曙。西子风波忠信误，魂归处，苍风无尽击鼙鼓。